



Grupo das Mulheres Parlamentares de Timor-Leste

**DISKURSU IHA OKAZIAUN KAMPAÑA 16 DIAS ATIVISMU HAKOTU
VIOLÉNSIA HASORU FETO NO LABARIK FETO TINAN 2020**

**IHA MUNISÍPIU ERMERA POSTO ADMINISTRATIVU ATSABE E
LACLUBAR**

26 DE NOVEMBRU DE 2020

Exelénsia Representante Governu, Feto Potensiál Munisípiu, Administrador Munisípiu, Xefe Suku, Konsellu Suku, NGO Nasionál, Estudantes no comunidade posto Administrativu Laclubar, hau nian respeitu no dader kmanek.

Kampaña 16 dias ativismu Hakotu Violénsia Hasoru Feto no Labarik Feto tinan 2020, ho tema ” **Mai ita Hamutuk Hatete Lae ba Asedio Sexual no Violénsia Sexual.**”

Liu husi definisaun iha Konstituisaun Repúblika Timor- Leste konsagra ona iha **artigu 16.º (Universalidade no igualdade)** ne’ebe sita ” **Sidadaun hotu-hotu hanesan perante lei, goza direitu no dever hanesan.**” no mos **artigu 17.º** ne’ebe sita (**Igualdade ba feto no mane**) ” **Feto no mane**

iha direitu no obrigasaun hanesan iha moris família, kulturál, sosiál, ekonómiku no polítiku nia laran. "

Iha 2003, Timor- Leste ratifika ona Konvensaun hodi Elimina Forma Oin-oin Diskriminasaun hasoru Feto (CEDAW/CEDCM) atu hapara violénsia bazeia ba jéneru iha Timor- Leste, nu'udar baze ba implementasaun abordagem integrada bazeia ba jéneru no mos kompromisu Internasionál.

Governu aprova **Rezolusaun Governu N.º 25 / 2017, de 17 de Maiu** konaba Planu Asaun Nasionál Kontra Violénsia Bazeia ba Jéneru (PAN-VBG) 2017-2021. Planu Asaun Nasionál - Violénsia Bazeia ba Jéneru estabelese pilar estrategiku 4 (haat) hanesan:

- (i) prevensaun ba violénsia bazeia ba jéneru;
- (ii) prestasaun servisu ba vítima sira;
- (iii) asesu ba justisa;
- (iv) koordenasaun, monitorizasaun no avaliasaun.

Objetivu esénsial husi kampaña ida ne'e maka atu fahe informasaun no sensibilizasaun konaba hapara violénsia hasoru Feto no Labarik Feto, hetan informasaun husi sosiedade relasiona ho problema violénsia hasoru Feto no Labarik Feto, no mos hatutan kompromisu ne'ebe mak estadu ratifika ona liu husi Parlamentu Nasionál konaba kualker tipu violénsia hasoru Feto no Labarik Feto iha Timor Leste.

Violénsia nudar hahalok a'at ne'ebe halo husi ema ida ba ema seluk no bele liu husi aktu fisiku ka aktu verbal husi liafuan ne'ebe kro'at hasoru ema ida iha uma laran ou iha sosiedade. Bainhira akontese violénsia sempre

resulta vítima no normalmente la hare ba kestaun sexu. Ita nota mos katak aktu husi violénsia ne'ebe akontese resulta vítima barak no mos iha kazu balun ne'ebe to'o halakon ema seluk nia vida no ida ne'e signifika krime hasoru humanidade.

Infelizmente, Timor- Leste kontinua regista número ne'ebe a'as iha Violénsia hasoru Feto no Labarik Feto maski Governu Timor- Leste aprova ona polítika hanesan Planu Asaun Nasionál ba Violénsia Bazeia ba Jéneru no Planu Asaun Nasionál ba Feto, Paz no Seguransa.

Grupo das Mulheres Parlamentares de Timor-Leste (GMPTL) nudar lian feto iha Parlamentu Nasionál iha kompromisu hodi garante servisu Parlamentu Nasionál ba implementasaun Konvensaun hodi Elimina Forma Oin-oin Diskriminasaun hasoru Feto liu husi aktividade hanesan ne'e.

Grupo das Mulheres Parlamentares de Timor-Leste (GMPTL) estabelese ona iha Legislatura dahuluk, iha tinan 2006 liu husi **Rezolusaun N.º2/2006, 12 de Abril**. Iha tinan 2007, GMPTL habelar liu tan nia papel no mandatu, liu husi **Rezolusaun No.16/2007**, 24 de Outubru hodi halo promosaun ba igualdade jéneru.

Grupo das Mulheres Parlamentares de Timor- Leste (GMPTL) iha Legislatura V (dalima) liu husi Plenária Parlamentu Nasionál aprova ona rezolusaun lubuk ida, hodi assegura Feto nia direitu no Liberdade:

- i) **Rezolusaun Komemorasaun Loron Internásional Família:** "*Família mak núkleu insubstituível iha sosiedade no oinsa forma*

sosiedade ne'ebe mak bele fó kontribuisaun ba nasaun liu husi hola parte iha desenvolvimentu nasionál. "

ii) Rezolusaun Adosaun medida relativa hodi Proteje Ema ho Defisiéncia: *" Importánsia atu garante ema ho defisiéncia nia dignidade husi promosaun ba integrasaun iha sosiedade ne'ebe inklusivu. "*

iii) Rezolusaun Adosaun medida relativa atu Prevene Infantisídiu no Abandono Bebé no Labarik: *" Hodi kompromete ba desenvolvimentu saudável Labarik Feto no Jovem Feto hodi assegura koñesimentu iha área saúde reprodutiva iha eskola, família no comunidade no mos formasaun ba professional justisa atu bele konduz prosesu investigasaun ne'ebe adekuada."*

Nune'e Grupo das Mulheres Parlamentares de Timor-Leste (GMPTL) iha ninian papel importante hodi hare ba asuntu jéneru oinsa atu feto no mane bele moris no hetan direitu hanesan no laiha diskriminasaun hasoru kualker ema ida, no sira bele hola parte iha desenvolvimentu nasionál.

Atu konretiza kompromisu hirak ne'e dalan ida maka liu husi diseminasaun informasaun relevante liu husi kampaña 16 dias ativismu kontra violénsia hasoru Feto.

Grupo das Mulheres Parlamentares de Timor-Leste (GMPTL) ohin loron simultaneamente hala'o semináriu iha Munisípiu 2 (rua) maka hanesan: Munisípiu Manatuto, postu administrativu Laclubar, nomos Munisípiu Ermera, postu administrativu Atsabe.

Iha semináriu refere involve Instituisaun Governu no mos sosiedade sivil liu-liu iha área Públiku no privadu nian hanesan Deputada(o), Ministériu Públiku, ALFELA, Rede Feto, SEII, Polisia VPU, JSMP (ACBIT) no instituisaun relevante nasional no internásional hodi tau hamutuk hanoin atu bele fo tulun ba Membru Parlamentu Nasionál, instituisaun Governu relevante no sosiedade sivil sira atu hala'o kna'ar ho diak kona-ba hapara violénsia kontra Feto no Labarik Feto iha Timor- Leste.

Mai ita hotu servisu hamutuk atu Timor-Leste tenki sai fatin Seguru ba Feto no Labarik Feto!

Mai ita Hamutuk Hatete Lae ba Assédio sexual no Violência sexual!

Obrigadu (a)!